

植物名實圖考

植物名實圖考卷之二十六

固始吳其濬著

蒙自陸應穀校刊

羣芳

紫薇

南天竹

萬壽子

春桂

蘭花

紅蘭

丁香花

棣棠

白棣棠

繡毬

八仙花

錦團團

粉團

錦帶

珍珠繡毬

野繡毬

美人蕉

鐵線海棠

翠梅

金燈

獅子頭

晚香玉

小翠

長春花

罌子粟

野鳳仙花

龍頭木樨



紫薇

曲洧舊聞紅薇花或曰便是不耐癢樹也其花夏開秋猶不落
世呼百日紅



南天竹

夢溪筆談南燭草木記傳本草所說多端今少有識者爲其作青精飯色黑乃誤用烏白爲之全非也此木類也又似草類故謂之南草木今人謂之南天竹是也南人多植於庭檻之間莖如朔藿有節高三四尺廬山有盈丈者葉微似楝而小至秋則實赤如丹南方至多

按所述乃天竹非南燭

李衍竹譜藍田竹在處有之人家喜栽花圃中木身上生小枝葉葉相對而頗類竹春花穗生色白微紅結子如豌豆正碧色至冬色漸變如紅豆顆圓正可愛臘後始凋世傳以爲子碧如


玉取藍田種玉之義故名或云此本是南天竺國來自爲南天竺人訛爲藍天竺人取此木置鳥籠中作架最宜禽鳥

甕牖閔評或云人家種南天竹則婦人多妒余聞之舊矣未知其果然否向在江陰時有一曹檢法者其妻悍甚蓋非止妒也曹曾建一新第求所謂南天竺者將植於堂之東偏余是時偶到彼姑以所聞告之曹慍然應曰其果然耶余家今無是尙不能安帖況復植此感動之物乎余曰事未可知聊爲耳目之玩亦自不惡也曹曰耳目未必得玩而先潰我心腹矣則不如其已遽命撤去坐客無不笑之南天竹以其有節似竹故亦謂之

竹而沈存中筆談乃用此燭字不知何謂

梁程譽天竹賦序曰中大同二年秋河東柳惲爲祕書監譽以散騎爲之貳讐校之暇情甚相狎監署西廡有異草數本綠莖疎節葉膏如翦朱實離離炳如渥丹惲爲譽言西真書號此爲東天竺其說曰軒轅帝鑄鼎南湖百神受職東海少君以是爲獻且白帝云女媧用以鍊石補天試以拂水水爲中斷試以御風風爲之息金石水火洞達無閼帝異焉命植於蓬壺之圃此其遺狀也然不如向時之驗矣譽怪斯言誕而不經因竊歎曰物故有弱而剛微而彰當其時也雷轟而騎翔非其時也穴蟠

而泥藏豈特斯草也感而作賦





萬壽子

萬壽子湖北園圃中種之葉聚枝梢子垂葉下宛似天竹子爲
冬月盆玩



春桂

春桂卽山礬本名樛花黃山谷以其葉可染不假礬而成色故
更名山礬或以爲瑒花殊誤宋人已辨之



蘭花

蘭花卽陶隱居所謂燕草李時珍以爲土續斷遯齋閑覽以爲幽蘭其種亦多山中春時一莖一花一莖數花者所在皆有閩產以素心爲貴俗以蜜漬其花入茶其根有毒食之悶絕茲圖不悉列

零婁農曰離騷草木疏謂蘭可浴不可食閩蜀士云屢見人醉渴飲瓶中蘭華水吐利而卒者又峽中儲毒以藥人蘭華爲第一乃知甚美必有甚惡蘭爲國香人服媚之又當愛而知其惡也嗚呼蘭爲上藥豈毒草哉不識真蘭徒爲謗書皆緣以葉似